

SHORTANDY JARSHYSY

Аудандық қоғамдық-саяси газеті

2007 жылдың 3 наурызынан шыға бастады №40 (776) 3 қараша, бейсенбі 2022 жыл

САЙЛАУ-2022

4 қарашадан бастап сайлаушылар өзі туралы деректерді тексере алады – ОСК

ҚазАқпарат – ҚР Орталық сайлау комиссиясы жергілікті атқарушы органдардың сайлаушылар тізімін учаскелерге беру мәселесін талқылады, деп хабарлайды ҚазАқпарат тілшісі.

«Азаматтар ел президентін сайлауға конституциялық құқығын сайлаушылар тізімі негізінде дауыс беру арқылы жүзеге асырады. Сондықтан сайлау процесінің маңызды ұйымдастырушылық элементтерінің бірі ретінде сайлаушылардың толық тізімін қалыптастыру мәселесі Орталық сайлау комиссиясының өткен отырысында арнайы қаралған болатын. Сол кезде жергілікті атқарушы органдарға келесі шараларды қамтамасыз ету тапсырылып еді. Біріншісі – жазбаша өтініштер негізінде, оның ішінде уақытша тіркелген азаматтарды сайлаушылар тізіміне енгізу тәртібі туралы азаматтарды кенінен хабардар ету. Екінші – сайлаушылар тізіміне енгізілгенін тексеру мен азаматтарға олардың сайлаушылар тізіміне енгізілгені туралы ақпарат беру бойынша ақпараттық сервистерді, атап айтқанда колл-орталықтарды, интернет-ресурстарды барныша іске қосу», - деді ҚР ОСК төрағасы Нұрлан Әбдіров.

Оның айтуынша, Орталық сайлау комиссиясы



сайлаушылар тізіміне енгізу мәселелері бойынша ақпараттық материалдар дайындады, олар республикалық БАҚ-та жарияланды.

«ҚР Сайлау туралы» конституциялық заңның 24 және 26,1-баптарына сәйкес, әрбір сайлау учаскесі бойынша

сайлаушылар тізіміне өз шешімімен учаске құрған әкім қол қояды және ол дауыс беру басталардан 20 күн бұрын акт бойынша ұсынылады. Әрбір сайлау учаскесі бойынша сайлаушылар тізімін тиісті әкім дауыс беру басталардан 20 күн бұрын акт бойынша аумақтық комиссияға ұсынады. ҚР Президентінің кезектен тыс сайлауын әзірлеу мен өткізу жөніндегі негізгі іс-шаралардың ОСК бекіткен күнтізбелік жоспарына сәйкес, кеше 30 қазанда тиісті әкімдер сайлаушылардың тізімдерін әрбір сайлау учаскесі бойынша аумақтық сайлау комиссияларына берді. Бұл бағытта қандай жұмыс жүргізілгенін білу үшін бүгін барлық өңірлердің есебін тындаймыз», - деді Н. Әбдіров.

Орталық сайлау комиссиясы барлық өңірлер өкілдерінің есептерін тындап, ұсынылған ақпаратты назарға алды.

«Құрметті сайлаушылар! Өзіңізді тіркеу орны бойынша сайлаушылар тізіміне енгізуді тиісті әкімдіктің сайтынан немесе колл орталық арқылы тексеруге болады. 2022 жылдың 4 қарашасынан бастап өз учаскеніздегі сайлаушылар тізімінен өзіңіз туралы деректерді тексеру мүмкіндігі беріледі», - деді Н. Әбдіров.

(Республикалық басылымнан)

Басты жаңалық

Әлеуметтік-өндірістік мәселелер шешіліп келеді

Облыс әкімі Ермек Маржықпаев жұмыс сапарымен Шортанды ауданында болып, тұрғын үй-коммуналдық шаруашылығы мен әлеуметтік салаға баса назар аударды.

Халықтың аздығына қарамастан, Шортанды ауданының Бозайғыр ауылында өндіріс дамыған. Осылайша «Бозайғыр» ЖШС 2012 жылдан бері «BI Group» и «Sensata Group»-сынды ірі құрылыс компанияларымен бірлесе отырып, кірпіш өнімдерін шығарумен айналысады.

– Өндіріс үшін шикізат жеткілікті, даму әлеуеті бар. Әр ауысымда 20 мыңға жуық кірпіш шығарылады, жұмысшылардың орташа жалақысы 200 мың теңге, 20 адам жұмыспен қамтылған. Несие алып, тағы бір пеш салып, жылдық өнім көлемін 25 миллионға жеткізуді жоспарлап отырмыз. Демек, жұмыс орындары да көбейеді, – дейді ЖШС директоры Шатлық Иминов.

– «Төңкеріс ХПП» ЖШС-нің заманауи диірмен кешенінде өндіріс көлемі жылына 36 мың тонна ұн өндіруге жетеді, – деген серіктестік директоры Владимир Стороженко жаңа сату нарығын дамытуды, Қытайға өнімді жіберуді жоспарлап отырғанын да атап өтті.

«Turan Industry» ЖШС өнімінің 70 пайызы Ресейге – Нижний Новгород пен Мәскеуге жөнелтіледі. Цех гранитті блоктарды ұқыпты плитқаға айналдыратын ЧПУ машиналарымен жабдықталған. Шикізат – Мойынқұм граниті. Ол Оңтүстік Қазақстаннан әкелінеді, өйткені, облыстағы гранит кен орындары табиғатты қорғау аймағында орналасқандықтан, оны игеру мүмкін емес. Дегенмен, компания өнім түрлерін көбейтуді, сұр және кара тас реңктерін қосуды жоспарлап отыр. Айтпақшы, кәсіпорынның өндірістік қуаты ауысымына 500 шаршы метр өнім, жылына ол 130 000 шаршы метр шамасында. «Қалаға қарағанда мұнда өз бизнесінді ашу оңай», – дейді тағы бір кәсіпкер, «Лисман» директоры Роман Лисман. 2017



жылы жас кәсіпкер «Даму» қоры арқылы «Бизнесің жол картасы» мемлекеттік бағдарламасы бойынша несие алған. Ғимарат салуға, құрал-жабдық алуға қаражат жеткілікті болды. Қазір «Лисман» ИП өнімдерін дүкен сөрелерінен көруге болады. Біздің тұшпара мен басқа өнімдеріміз ақмолалықтардың сұранысына ие, деп қосты ол.

Шортанды ауданындағы нысандардың қатарында өндірістік қана емес, әлеуметтік нысандар да бар. Ең бастысы – емхана мен мектеп. Бозайғыр дәрігерлік амбулаториясы 2015 жылы салынған. Қабылдауды 2 дәрігер жүргізеді, 3 төсектік күндізгі стационар жұмыс істейді. 12 жыл бұрын емдеу мекемесіне жалпы тәжірибелік дәрігер Виктория Пенер жұмысқа келген.

– Жаңа ғимараттың жағдайы әлдеқайда жақсы. Жақында ғана ашылған жедел жәрдем стансасының халыққа көмегі зор. Ауылдастарына шұғыл сапарға шығумен қатар, бригада тас жолда апат болған жағдайда көмек көрсетеді. Дәрігерлік амбулаторияға 3700 адам бекітілген, оның 170-і денсаулығына ерекше көңіл бөлуді қажет ететін зейнеткерлер, – дейді Виктория Николаевна.

Бозайғыр орта мектебінің ғимаратына 2019 жылы 164 миллион теңгеге жөндеу жұмыстары жүргізілген. Мектеп директоры Ардагер Қайрат бұдан кейін ұжым мен мектеп оқушыларының өмірі жақсы бағытқа өзгергеніне де тоқталды. Онда есік, терезелер, едендер, жылу жүйесі толығымен ауыстырылып, екіжеке қазандық салынған. Жөндеу жұмыстарының бәрі ойдағыдай өтпесе де, қазір оқушылар күрделі жөндеуден өткен мектепке қуана барып жүр екен.

– Ауыл өсіп жатыр, бала туу көрсеткіші артуда. 2024-2025 жылдары тағы 300 орындық мектеп салуды жоспарлап отырмыз», – деді Ермек Боранбайұлы.

(«Арқа ажары» газетінен)

Брифинг

Ауыз судың сапасы сын көтермейді

Ақмола облысындағы ауыз су мәселесі талапқа сай келмей тұр. Микроб көрсеткіштеріне тапсырылған 500-ге жуық сынаманың нәтижесі көңіл көншітпейді. Санитарлық-химиялық көрсеткіштерге арналған ылғал сынамаларының 10 пайыздан астамы да сын көтермейді. Бұл туралы өңірлік коммуникациялар қызметінде өткен брифингте айтылды.

Ақмола облысының бас санитарлық дәрігері Айнагүл Мусина айтып өткеніндей, ауыз суға қойылатын негізгі талаптар: эпидемиологиялық тұрғыдан қауіпсіз, уытты көрсеткіштер бойынша зиянсыз, ал, органолептикалық көрсеткіштер және шаруашылық қажеттіліктер үшін жарамды болуы тиіс.

–Микробиологиялық көрсеткіштерге 2785 сынама зерттелді, оның ішінде 499 сынама нормаға сәйкес келмейді. Санитарлық-химиялық көрсеткіштерге 2769 су сынамасы зерттелді, ол да талапқа сай емес. Орталықтандырылған сумен жабдықтаудың 273 объектісінде ауыз судың сапасын ведомстволық бақылау жүзеге асырылады, оның ішінде 3 өндірістік зертхананың күшімен 28 су құбыры қамтылды. Өндірістік бақылау шеңберінде жыл басынан бастап микробиологиялық

көрсеткіштерге 3383 су сынамасы зерттелді, оның ішінде 75 сынама талапқа сәйкес келмейді. Бүгінгі күні ауыз суды тазарту машиналары мол сұранысқа ие. Мониторинг жүргізу кезінде санитарлық-химиялық көрсеткіштерге 232 сынама алынды, оның ішінде сәйкес келмейтіндері анықталған жоқ, – деді облыстың бас санитарлық дәрігері.

Айнагүл Мусина коронавирус инфекциясымен сырқаттану мәселесін де тілге тиек етті. Жалпы, эпидемиология бойынша жағдай тұрақты. COVID-19 ауруының өсуі 15 маусымнан бастап байқалды, сөйтіп, өткен аптада, яғни, 4-11 қазан аралығында 44 жағдай тіркелді, ал, 12-18 қазан аралығында 30 жағдай тіркеліп, 1,4 есе төмендеу байқалды. Күн сайын тіркелетін аурулардың жаңа жағдайларының саны бойынша біздің облыс үшінші орында тұр. Айнагүл Мусинаның айтуынша, уақытылы вакцинация мен ревакцинация алмау вирустың таралуының басты себебі. Мәселен, қазан айында ауырған 92 адамның 39-ы вакцинацияланбаған, 32-сі уақытылы ревакцинация алмаған, 71-інің иммунитеті төмен болған.

(Облыстық басылымнан)

Аудан жаңалығы

«Заң керуені» акциясы өткізілді

Өткен аптада аудан әкімі С. С. Шабаров Ақмола облысы прокуратурасы аппаратының басшысы Е.Ш. Жандосовпен және Шортанды ауданының прокуроры Е. А. Тоқбаевпен бірлесіп аудан тұрғындарымен кездесу өткізді.



Кездесудің негізгі тақырыбы қаржы пирамидалары мен интернет-алаяқтықтардан сақтық шараларын талқылау болды.

Іс-шараны ұйымдастырушылардың айтуынша, акция жергілікті тұрғындарға жедел құқықтық көмек көрсетуге, құқықтық мәдениет деңгейін арттыруға, қолданыстағы заңдарды түсіндіруге бағытталған.

Қатысушылар өздерін қызықтырған сұрақтарын қойып, оларға түсініктеме ала алды.

Айта кетейік, акция облыстың барлық өңірлерінде бір ай бойы өтеді.

Аудан әкімінің баспасөз қызметі

Құттықтаймыз!

Шортанды аудандық Қоғамдық кеңесінің мүшесі, А.И. Бараев атындағы «АШҒЗО» ЖШС зертханалық-бейімделу және агроландшафттық технологиялар бөлімінің меңгерушісі Ақшалов Қанат Әшкәйұлын «ЕРЕН ЕҢБЕГІ ҮШІН» жоғары мемлекеттік марапатымен құттықтаймыз.



Ақшалов Қ.А. ауыл шаруашылығы ғылымының игілігі жолындағы тынымсыз еңбегі үшін бұл марапатқа ие болды. Ол халықаралық ғылыми қауымдастықтар мен ауыл шаруашылығы компанияларында танымал. Жас ғалымдардың тұрақты тәлімгері, ғылымның өркендеуіне өз үлесін қосатын полиглот.

Қоғамдық кеңес